

BI HIPOTESI

Hiru soldadu amerikar eta bost aliatu hil dituzte AEBek huts egitez

Ameriketako Estatu Batuek epe laburrean behintzat Irak bonbardatzeko asmorik ez dutela jakinarazi du Colin Powellek

Erredakzioa | DONOSTIA

Ameriketako Estatu Batuek Kandahar eta Tora Bora inguruak bonbardatu zituzten berriro atzo, Osama Bin Laden eta Al Kaedako kideen kontra egiteko ahaleginean. Bortitza izan zen bonbardaketa saioa. Bonbardatzaile guztiek, baina, ez zuten asmatu Pentagonoak onartu zuenez. Hala, B-52 bonbardatzaileak aliatuen posizio bat jo zuen Kandahartik gertu, hiru soldadu amerikar eta talibanen aurkako aliantzako bost kide hil eta beste 20 lagun zaurituz —Hamed Karzai tartean—

Satelite bidez gidatutako 2.000 kiloko jaurtikaria izan zela jakinarazi zuen Pentagonoak, huts egitea izan eta ordu gutxira. AEBetako indarrek, hala ere, ez zuten argitu huts egite hori zerk eragin zuen. Bi hipotesi nagusi aztertzen ari ziren berria zabaldu zuen Pentagonoak, atzo arratsaldean. Bata, satelite bidezko sistemak huts egin zuela, eta bestea, okerreko aginduak eman zirela dioena.

Bidenabar, Afganistango ekialdeko kobazuloetan Bin Ladenen bila jarraitu zuten atzo ere AEBetako indar bereziek, bertako jendearen laguntzarekin. *Mendi zurietan* —Jalababad hegoalde 50 kilometrora daude— aurrera egiteko ahalegin horretan, eragozpen handirik ez zutela izan azaldu zuen talibanen aurka aritu ziren afganistandarren taldea. Nagarhargo iturriek esan zuten, borroka labur eta ahulak izan ziren, eta ez zen hildakorik egon.

Hala ere, atzoko borroka txiki horiek AEBetako indar berezien eta talibanen aurkako tribuen eraso handiago baten aurrekari baino ez direla zehaztu zuten iturri horiek. «Hasi baino ez da egin borroka hau», azaldu zuen, horren harira, Richard Myers AEBetako Estatu Nagusiko buruak.

Horren inguruan, 3.000 gizonetako taldea osatzen ari zela ja-

Satelite bidezko sistemak huts egin duen edo okerreko aginduak eman ote diren aztertzen dihardu Pentagonoak

ERASO ASMOAK

Atzokoak AEBen eta talibanen aurkako tribuen eraso handiago baten aurrekari direla esan dute iturri horiek

kinarazi zuen Hazrat Ali Nangarharren Segurtasunerako Taldeko buruak. Erasoak edozein unetan hasteko prest daudela nabarmendu zuen Alik. Ronald Rumsfeld AEBetako Defentsa idazkariak, bestalde, bere babesa eskaini zion Aliri. Tora Bora inguruetan talibanen kontra egiteko 2.000 gizon bidu direla dioen berriaz, baina, ez zuen deus esan.

Tora Bora eskualdean eraso handiago bat prestatzeko lanez mintzatu zen, halaber, George Tenet CIAko zuzendari nagusia. Tenetek Bin Ladenen aurkako borroketan laguntzeko eskatu zion Pakistango Gobernuari. Iparraldeko Aliantzak, berriz, tinko jarraitzen du berean. Kandahar inguruetan zabaldu ditu bere gizon gehienak, Bin Laden hango mendietan dagoen ustea dutelako.

Irak bonbardatzeko asmorik ez

Iraketik gertuen dagoen estatua izanik, haren kontrako erasoek Turkiari ere kalte egingo liokeen kezka agertu zion atzo Bülent Ecevit Turkiako lehen ministroak Colin Powell AEBko estatu idazkariari. Hark, berriz, AEBek epe laburrera Irak erasotzeko asmorik ez dutela erantzun zion.

«George Bush presidenteak Irakekin arduratuta gaudela esan zuen bere garaian. Irakek suntsitze handietarako armak egiten ditu eta terrorismoa babesten du. Baina Afganistanen kontrako operazioaren hurrengo urratsetan ez diogu Iraki erasoko, presidenteak ez du ildo horretan ezer erabaki». Hitz horiekin erantzun zion Powellek Turkiako lehen ministroari.

Turkiako Atzerri ministro Ismail Cemek, bere aldetik, terrorismoari gogor egiteko konpromisoa agertu zion Powell. Hala, Irakek Nazio Batuen erabakiei kasurik egin ezean Turkiak bere kontra egin beharko duela esan zuen, «gustuko izan ez arren». Aitzitik, ez zuen argitu Turkiak zer egingo lukeen AEBek Bagdadi erasotzea pentsatuko balu.

Borrokak Afganistanen / Abenduak 5



JIM HOLLANDER / AP

ERASORAKO AIREKOAK. AEBren airekoek bonbardaketa bortitza egin zituzten atzo, Kandahar eta Tora Bora inguruetan. Irudian, marineen CH-53 hegazkina aireratzen, Afganistan hegoaldean.